

Vizyon

Ki pe arive Sesel? Proteze nou zanfan!

Tou Seselwa i dan sok apre sa bann nouvel terib lo SBC ki bann zenn fiy ant 3-8an in ganny abize seksyelman. Dimoun pe demande ki pe arive dan nou pei? E tou dimoun pe dir ki fodre proteze nou bann zanfan kont sa bann dimoun malad e pervert. Me an menm tan Seselwa pe war sa bann kalite aksyon koman bann sinny ki nou sosyete pe kontinyen degrade moralman. Serten dimoun in apel sa en 'dekadans moral'. Seselwa fodre reveye pou refer nou pei.

En lespri vremen malad

Ki kalite maldi en zonn i kapab annan pour li abiz en zanfan 6 oubyen 8an? Ki kalite lespri sa bann dimoun parey i annan? Seselwa i abitye antann sa bann kalite zistwar dan film, e alor nou soke letan nou war sa kalite nouvel pe ganny raporte dan nou prop pei, e bann aksyon ki ariv avek bann zanfan ki nou konn zot ek zot paran. Sa i vremen degoutan, e nou demande ki lapolis ek bann lotorite konserven i pran bann aksyon imedyat e sever pou koriz sa kalite aksyon avan ki i pran en lot dimansyon dan nou sosyete.

Plis aksyon pou proteze nou zanfan

Nou zanfan i bezwen kapab grandi dan en sosyete kot zot ganny proteze. En zanfan i inosan e alor nou, bann adilt nou bezwen a tou moman proteze nou zanfan kont nenport danze. Me letan bann adilt menm i komans abiz nou bann zanfan, sa i enkyetan, e i devret fer nou reflesi lo bann mezir pli serye ki nou bezwen pran pou proteze nou zanfan. Lo sa nivo, i nesesser pour tou adilt reste alert, me an menm tan i enportan pour ki bann lazans i fer zot travay san okenn

diskriminasyon, me dan en fason drwat e zis. Nenport ki adilt ki fer sa kalite aksyon avek nou zanfan i devret fer fas avek lazistis, e si zot ganny trouve koupab, zot merit pinisyon sever ek tretman apropiye.

Solidarite avek paran ek Viktim

Lo nou kote dan SNP, nou eksprim nou solidaite avek bann paran ki pe pas dan sa moman difisil ki parey en kosmar. Nou konnen ki zot kontan zot zanfan, e ki zot anvi zot zanfan grandi byen. Nou osi ofer nou solidarite sa bann zanfan ki'n tonm viktim sa bann adilt avek lespri malad. Nou espere ki zot ava kapab efas sa move leksperyans e grandi byen san okenn problem pli tar. Letan SNP i kondann sa kalite aksyon, nou pou osi lite pour ki sa kalite

konportman i ganny eliminen dan nou sosyete e tou koupab i ganny pini.

Fodre refer nou sosyete

Seselwa, nou sosyete pe al dan en move direksyon. Partou kote nou pe war en kalite dekadans ki pa donn gran lankourazman. Me sakenn parmi nou i bezwen debout e ede pou fer li sanze. Ozordi i zanfan en vwazen ki pe ganny afekte, me si keksoz i kontinny koumsa, plitar i riske ariv dan nou prop lakour. Alor nou tou ansanm nou bezwen montre sa solidarite e konbat sa bann vilen mers ki pe montre zot vilen figir. Nou zanfan i nou trezor, annou proteze zot dan tou sitiasyon move a tou moman.

Fermye pe esper promes 500,000 dolar

Gouvernman SPPF i kontan koz labous plen e rod tou bann pli loportinite pou zistifye tou bann desizyon enpe kontrovers ki zot pran. Ziska prezan okenn garanti ou lendikasyon pa ankor ganny donner lo pozisyon gouvernman vizavi sa 500 mil dolar ki i ti promet pou donn fermye tou le mwan. Byento 'Animal Feed factory' pe al ganny privatize e tou i an kestasyon.

Parey nou'n war sete selman kan fermye ti menase pou desann lo semen ki gouvernman ti azir konman bann gran senyer politik e swazir en mezir kour term e pli fasil pou fer fas ek sitiasyon. Ozordi kestasyon ki bokou dimoun pe demande se: Akoz aprezan? Eski aprezan zot pou lav zot lanmenm e pas tou responsabilite lo sa swadizan partener

stratezik?

Ki mannyer nou pou apel en gouvernman ki ozordi i dir i pou donn 500 mil dolar par mwan pou garanti manze zannimo dan pei e asir bon prodiksyon, me demenn sa menm gouvernman i lav son lanmenm dan sa menm sitiasyon san okenn leklersisman detaye?

Souvann fwa nou tann serten manm dan parti SPPF sezi bann loportinite pou blanm privatizasyon pou esey zistifye mankman komodite oubyen komodite tro ser dan magazen. Ki mannyer nou apel en gouvernman ki azir iresponsab e les pei vin dan salte e apre esey privatize e larg tou fardo lo ledo bann biznes prive? Lepep pe espere pou war ki mannyer keksoz pou deroule. Fodre ki Gouvernman SPPF i vin serye.

Napa Minis ki pe koz lo SMB

Bokou kestyon pe leve otour program privatizasyon SMB ki gouvènmman pe fer. Dimoun i rapel byen ki ler lakonpanyen SACOS ti ganny privatize Minis Dugasse ti donn plizyer long entervi lo SBC. Sa voyaz ki pe arive?

Nou pa vwar ni Minis Faure koman Tyermenn SMB e ni Minis Dugasse ki responsab pour Lendistri. Akoz zis bann zofisyè sinyor sa bann lakonpanyen ki pe kree ki'n vin devan pou koze? Piblik i oule vwar plis transparans dan sa bann demars.

SNP i kwar ki en pli o zofisyè gouvènmman i devret pe eksplik lepep plizyer keksoz tel ki sekirite lanplwa bann travayer, responsabilite sosyal bann partener stratezik, bann det ki SMB pe kit deryer e pou dir nou konbyen pei pou gannnen atraver sa bann lavant.

Eski silans bann o zofisyè gouvènmman i vedir zot pa anvi pran responsabilite anka keksoz pa al dapre plan? Piblik i oule osi konn poibilite aste par dan sa bann nouvo lakonpanyen, parey in leka dan SACOS. Pli enportan, piblik Seselwa i oule ganny garanti sa bann lenvestisman pou dan benefis pei e ki tou dimoun pou benefisyè avek zot.

Travayer SMB osi i oule serten larepons ki kriter ki ganny servi pou pous detrwa e gard lezot. In annan tro boku zoli parol dan lare-

pons lo leta lanasyon, me selman travayer i trouv zot san en lanplwa o-milye sa sitiasyon lavi difisil. Lo Praslin meyer travayer pour 2007 in ganny met deor. tandi ki sa ki annan

kontak i reste. Fodre ki SPPF i dir avek travayer ki pe arive, e fer lezot demars pour zot ganny en lanplwa o-pli vit posib.

Eski Gouvènmman SPPF i war zis detrwa dimoun dan Sesel?

Mardi pase Gouvènmman tiannonse ki in etabli en konpani ki pour zer bann lentere ek par gouvènmman dan bann lantrepriz prive ek piblik.

Dapre Gouvènmman manda sa lakonpanni se pou ed zot zwenn target bann devlopman ki pei pe antreprann.

Kestyon ki piblik pe denmande, se akoz ki Gouvènmman i apwent manm bann board ki i met an plas zis avek menm dimoun ki'n deza annan bokou lezot responsabilite?

Avek tou respe ki dimoun i annan pour lentelizans dimoun, zot demande ki mannyer menm dimoun pou kapab desarz tou sa bann responsabilite? Eski napa lezot Seselwa ki kapab pran sa bann responsabilite?

I paret ki menm si piblik i retisan lo bann tel desizyon, gouvènmman i tanpi e i apwent sa ki fer li plezir. In vin en norm dan Sesel pou aksepte ki zis serten dimoun ki annan lespri e ki konn tou keksoz. Serten i ganny plizyer rol ek responsabilite ki swiv par gro gro sonm larzan an term lapey, tandi ki bokou lezot ki osi Seselwa, pa ganny ni en travay e sel rekour parfwa se kit pei.

Eski pa zot menm ki dir ki sistenm ledikasyon i tre bon? Si i bon akoz napa lezot Seselwa ki ganny sans pran responsabilite bann byen nou pei? Pou donn sa en lendividi ou en group dimoun ki deza annan lentere dan devlopman serten proze dan pei pa en aksyon responsab ditou.

Gouvènmman in koz bokou lo sa zafer konfli lentere, tou dernyenman, an relasyon avek son manm Lasanble avek 2 lapey, zot koz bokou lo donn lazènes son vre plas dan devlopman. Alor oli sa bann zenn dan sa plan kot SPPF i kontan dir i met dimoun o-sant tou devlopman?

Pour bokou Seselwa, Sesel napa en sel Prezidan, me plizyer. Sa bann menm dimoun lo sa bann bord pe vin parey bann prezidan dan zot prop drwa. Kan eski tou Seselwa pou ganny konte dan son pei Sesel? Kan eski SPPF pou arete war zis zanmi dan sa pei?

'Carers' i dezapwente!

Zoli parol SPPF pa mars an linny avek aksyon konkret. Tou dimoun i rapel sa lafanfar ki bann Onorab SPPF ti fer dan Lasanble lo sa size logmantasyon bann 'carers'.

Lefe ki SPPF ti'n admet dan Lasanble ki sa ti en lenzistis kont bann 'carers' ek travayer URS, sa bann travayer ti pe espekte ki sa ti pou ganny rektifye lafen dimwan Fevriye. Zot ti menm kwar zot ti pou osi ganny en 'back pay' pour mwan Zanvyè parey SNP ti pe propoze. Me malerezman sa bann zoli parol in fini dan divan, e ban 'carer' i dezapwente akoz ni en sou pa'n rantrè dan zot lanvlop.


Ozordi ankor enn fwa nou pe fer lapel avek sa gouvènmman pou donn bann 'carers' ek bann travayer URS zot logmantasyon. La avek sa logmantasyon dan pri gas ankor, sa bann dimoun pou war zot dan plis difikilte ki oparavan, pour zot kapab balans bidze kot lakour.

Deza sa bann dimoun pe fer resorti ki avek sa saler ki zot pe touse zot pa pe arive kouver sa bann gran logmantasyon ki'n arive dan pri lavi e ki pe kontinnyen monte. I kler ankor

enn fwa lafason ki dimoun i ganny servi par SPPF. Pa oublie ki mazorite sa bann dimoun ti desann lo laplenn pou kriy pour Jj!

SNP i demande ankor enn fwa ki Gouvènmman SPPF i pran sa bann dimoun o-serye e tret zot dan en fason normal e donn zot sa logmantasyon parey zot ti promet dan Lasanble. Pa zis anbet dimoun, me fer zot aksyon mars avek zot parol.

Nou ankor pe esper nou lapey



Ser Editer,

Depi mwan Oktob bann porter ek sekirite ki anploye avek Minister Lasante, pa'n ganny peye larzan overtime. Nou'n fer tou demars, monte-desann kot seksyon accounts pou rod nou pti gramm, tou-l-tan zot anvoy nou demen-tanto. Reprèzantan Minister ti eksplik nou ki larzan dan bidze ti'n fini, e ki fodre ki nou esper nouvo bidze.

La nou'n ariv mwan Mars kot laplipar minister in fini ganny donner zot bidze, me nou ankor pe vey petet. Nou pe demande ki

lotorite konsernen i fer demars o pli vit posib pour nou ganny peye nou overtime.

Malgre ki nou dezapwente koman bann travayer ki responsab, nou pe kontinnyen fer nou overtime. An menm tan ki nou nou pe montre sa bonn volonte, i pa normal ki nou bezwen sibir sa konsekans move planifikasyon sa gouvènmman SPPF e neglizans Minister Lasante. Nou osi nou soufer parey lezot travayer. Get dan nou welfare silvouple. Apre tou nou osi nou annan fanmiy!

En travayer lasante

Nou Pa Pou Zanmen Les Tonbe!